

‘UK’ aldizkaria desagertu eta ‘Hiruka’ abiatuko da

BATEK EZ, bi komunikazio proiektuk itxiko dituzte ateak, baina ordainetan hiru euskarritan arituko den komunikazio egitasmoa jarriko dute abian Bizkaiko Uribe Kosta eskualdean.

Hiruka komunikazio taldeak atari digitalari, paperezko astekariari eta irratitari helduko die. Bistan denez, ez dira ezerezetik sortuko, orain arteko ibilbideaz baliatu eta proiektu sendoagoa egiteko asmotan dira Uribe Kostan.

Getxon, ia duela 20 urte *Bizarra Lepoa*n aldizkaria sortu zuten eta 1999an UK aldizkari bihurtu zen.

UKberri.net atari digitalak berri, 11 urteko ibilbidea egin du. Koska irratia ere hainbat urtez entzun ahal izan zen uhinetan.

Urtarrilarren bukaeran paperezko astekaria eta atari digitala hasiko dira lanean eta hilabete batzuk geroago Justuri Irratia abiatuko da. Uribe Kostako komunikazio talde euskaldun berriak irabazi asmorik gabeko kooperatiba sortu du. Egitasmoa



Azken “UK”, egitasmo berriaren berri ematen.

sostengatzeko bazkide erabiltzaileak eta laguntzaileak izango ditu.

Erabiltzaileen kasuan, pertsona juridikoek 1.000 euroko inbertsioa egingo dute eta norbanakoek 100 eurokoa. Laguntzaileen kasuan, pertsona juridikoek 200 eurokoa eta norbanakoek 50 eurokoa. Gainera, 33 euroko kuota ordaindu beharko dute urtero.

Anjel Lertxundik Berrian esanak:

“Hedabide dezente azpimarratu zuen Arantza Quiroga euskaraz jardun izana popularren La Granjako konbentzioan: Urquijo han baldin bazebilen, ikusteko-ak izango ziren haren espantu, imintzio eta pariztak.

Aurtengo Durangoko Azokak Quirogaren bisita izan zuen albisteetako bat: han ere ez genuen Urquijo ikusi haren alboan eta abaroan.

Laster, hauteskundeak, klaro. Baina Quirogak sinesgarritasun gehiago irabaziko luke argituko baligu bat al datorren Urquijok EAEn praktikatzen duen euskararen herra neurotikoarekin: nik dakidala, Europak ez du Urquijok salatutako neurri bakar bat salatu. Aitzitik, ordea, Nafarroan: Europak salatua du bertako Gobernuaren euskararen kalte-tako erabaki bat edo beste, baina Nafarroako delegatuak, Carmen Albak, Europari pase foralaren erantzuna du arau.

Quirogak aplikatuko lukeen hizkuntza politika bat dator bere alderdiko bi delegatuenarekin? Erantzunak sinesgarritasun gehiago emango lioke bere kanpaina hasierari”.

EKONOMIAREN TALAIA • TERMOMETROA

Lanbide Heziketa berreskuratu

Langabeziak gazteen %50ari eragiten dio eta Euskal Herrian ere arazo oso larria da. Horregatik, haren kontra egin eta alternatiba sendo eta errealak eskaini behar dira. Azken asteotan zientzia, teknologia eta berrikuntzaren alorrean hainbat plan aurkeztu dituzte, eta horien bidez 2015erako enplegua sortzeko promesak egin dituzte. Etorkizuneko sektore berriez asko hitz egin da: nanoteknologia, bioteknologia, ekonomia berdea, informazio eta komunikazioa... Esaten dutenez —gehiegi zehaztu eta neurtu gabe— enplegu egonkorra sortuko dute, ongi ordaindua eta deslokalizatu ezin dena. Egia ote da? Agian.

Ezein gaztek, ordea, ez du izango baliabiderik sektore horiek eskatzen duten prestakuntza mailara iristeko. Milaka dira gaur egun sektore horiekin inolako loturarik ez duten gazteak. Badaude ordea beste batzuk, krisia gainditutakoan pertsonal espezializatua beharko dutenak. Eta horretarako Lanbide Heziketa indartu eta berreskuratu beharko da. Bere garaian, arte eta lanbideen eskolek milaka euskaldunentzako enplegua segur-

tatu zuten. 1985-1990eko krisiaren ondoren enpresa ugari eskulan berezitua behar zuten eta Euskal Herri- tik kanpo ekarri behar izan zuten, lanbide heziketa bazterrean utzita egon zelako.

Familien, hezitzaileen eta erakundeen eginbeharra da gure gazteria orientatu eta azaltzea euren etorkizuna asebetetzeko bide guztiak dituztela irekita, berdin unibertsitatean eta lanbide heziketan. Industrian eta zerbitzuetan enplegu ugari dago eta horietara lanbide heziketa duin batekin ere irits liteke. 2020an kualifikazio berezirik gabeko pertsonentzako lanpostuak %8 baino ez dira izango Euskal Herrian. Oso baliagarria litzateke erakundeek, beste neurri batzuen artean, Lanbide Heziketako alor ugarien berri emango balute, hala nola azalduko balituzte bide hori aukeratzen dutenek etorkizun-ean enplegua lortzeko dituzten posibilitateak.



Juan Mari Arregi